

ASO TOFI, 23 IUNI 2022

Na toe faaauau Taulumaga a le Fono Aoao Faitulafono i le itula e 6:00 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2021/2022 & Tulafono Tau Faaofi o le Faatatauina o Tupe 2022/2023.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Faamalo le onosai i le tatou Palemene. E faataatiaese tatou Taulumaga i le itula e 1:00 i le aoauli ua maea saunoaga a le sui usufono mo Satupaitea. E matau atu foi ua le toe toatele ni sui usufono e le i saunoa. O le taimi foi nei o le afiafi ua malolo uma le itumalo ma faalogologo mai i le leitio ma matamata mai i le TV, ua talafeagai lelei ma saunoaga ua tapena mo lenei afiafi.

Ia, o le avanoa lenei o se tasi o sui usufono mamalu e fia saunoa. Ia, tulai maia lau Afioga i le sui usufono mamalu o Lefaga ma Faleaseela, ia o le Komiti, ae tuu atu ia le avanoa.

Afioga MASINALUPE MAKESI MASINALUPE (Lefaga ma Faleaseela): Faafetai i lau Afioga i le Fofoga Fetalai mo le avanoa o lenei foi usugafono aua se sao o lenei itumalo o Lefaga ma Faleaseela aua le tala Faatatau o le Tupe 2021/2022.

A o le i faia se tala, e muamua ona faatalofa ma faafeiloai atu i le paia maualuga o le faatafafa o le malu. O le a mamalu pea ia le aitu o le aoa i le afio o lau Afioga i le Fofoga Fetalai, afio lau Afioga i le Sui Palemia, afifio Afioga i alii ma tamaitai o le Kapeneta, afifio foi le mamalu o Sui Minisita.

Liliu i le la itu o le malu, e faafeiloai atu i lau Afioga i le Sui Taitai, e faapea foi le mamalu o sui usufono mamalu o le Palemene o Samoa.

E manatu i lenei itula afiafi, o lea ua faasolo ina fano atu ata o le fetu na tai, a ua faauto foi i tuafanua manu o le afiafi, ina ua lele ma apata le manufanua, aua o lea ua faofale le mamalu o aliiseu. Ona ou manatua ai lea o le pese i le masina malupeaua, e le lilo lona atualua, a o lenei afiafi, e

manatu sa tu lava i Fagalilo le tapaau o le Alataua, pe tua ma ni a lenei afiafi, aua le toe faaauauina o le Fonousu a Samoa, aemaise o le Palemene.

Ia, e piiama foi pei ona e siitia le tatou faafetai i le tatou Tapaau Sili oi le lagi i le taeao ua fano aua Lona alofa faaso, Lona agalelei aveaveloa i le paia maualuga o lenei Palemene. E ui foi ina tatou le mafuta ma faatasi ma le Afioga i le Tamaitai Palemia ona o faigamalaga e pei ona feagai ai ma le latou aumalaga, e i ai le talitonuga o lo o malutia ma leoleo ma puipui e le tatou Matai Sili o i le lagi. Faafetai i le Atua ma Lona agalelei, aemaise o Lana tausiga o lo o maualuga ai pea le aoina o le masina i le Palemene aemaise o le talanoaina ma le lauliliuina o le Tala o le Tupe.

E manatu foi i lenei afiafi, o lea ua toe faagasolo a tatou galuega, o lea foi ua maua se faasiligamalosai i lau Afioga i le Ffooga Fetalai, aemaise foi o le mamalu o le Palemene.

E faafeiloai atu foi i le Afioga i le Faamasino Sili ma lou soatau, aemaise o Ofisa Sili o Pulega o Matagaluega aemaise o Galuega Tumaoti. E momoli atu le faamalo ma le faafetai, malo le onosai, aemaise o le Failautusi ma le mamalu o le Ofisa.

E manatu foi o paia ma mamalu o Samoa, ia o le a le oo i ai se leo aua e manatu o paia lava mai le amataga seia oo lava i le gataaga. E manatu foi o paia lava ma mamalu e leai lava se vave e leai foi se poto na te faaopoopo pe toe toese le atoalio o le masina i paia ma mamalu ua maea oan tosi lauti ma mamanu faatiti e le au tulatoa ma le au fueloloa.

A o lenei itula, si ou itumalo pele o Lefaga ma Faleaseela, o le a taumafai atu se sao o le tatou itumalo aua le Tala Faatatau o le Tupe 2021/2022. E manatu o paia lava lea e mai le malae o le toto seia paia Mulivai ma Lalotoa aua le paia o le afifio o le Aiga Satuala ma le Tama a Satuala, afifio le Taulagi ma le matua o Satuala, alaalatai le mamalu o Gagaeolo ma le Itu, le fetalaiga i le Fale Tuisavailuu, tainane polo e fa o le Faleaana ma le tagata o le vavau.

O paia ia o si ou itumalo o le a oo i le tulaga o nuu taitasi mo le faasaoina o le taimi, a o paia na ma mamalu na, o le atoaga na o paia ma mamalu o si o tatou itumalo o Lefaga ma Faleaseela.

E manatu i lenei itula afiafi i se sao, a vaavaai atu i lenei Tala o le Tupe, e momoli lava le agaga faafetai. Faafetai i le Afioga i le Tamaitai Minisita aemaise foi o le Matagaluega. E manatu foi i le tulaga i lenei afiafi, e momoli foi le faafetai i la matou Komiti le Afioga i le Taitaifono, Sui Taitaifono aemaise o sui usufono mamalu o lenei Komiti, Komiti o Tupe. Ou te faatusaina lava le faagasologa o galuega e pei ona sa feagai ai lenei Komiti, ou te faatusaina lava le faagasologa, aua e i ai le manatu, se i tau fuafua i se tulaga e faafaigofie. E manatu o lenei mamalu o le Palemene, o le 90% po o le 95% e fiafia i le taaloga o le lakapi. E i ai foi la le talitonuga e tai faapea se faagasologa o le feagai ai o le Afioga i le Minisita, aemaise o le Steering Committee ma le Matagaluega. Ou te faatusaina i le coach, o le management,

faapea foi le autaaalo i le latou game plan ona aumai, pei ona i ai le PDS po o le Pathway to the Development of Samoa, a o lona theme – Empowering Communities Beating Resilience and Inspiring Growth. Ia, o lo o i ai foi ma ona principles po o mea e agai i ai le faatinoga o nei fuafuaga uma, e pei ona i ai le faaleleia o le atinaega o le soifuaga lautele, faalauteleina o le tamaoaiga ma gafataulimaina, saogalemu ma le faatuatuaina o pulega lelei, siosiomaga, malupuipua ma suiga o le tau, tulaga i galuega a le Malo ma Atinae Tetele.

E tasi lea vaega e ese le faafaigofie ai o le galuega a lenei Komiti, o le i ai o le taiala e limataitaiina ai ma faagasolo ai le gasolo atu o Matagaluega, ina ia manino ma lelei atoatoa le faagasologa e pei ona faataatia mai e le taiala.

O lea la ua i ai le Coach ma le autaaalo ma le management, a o le fesili, o ai la lea e laufali? Ia, o lou lava talitonuga o le Komiti o Tupe o le ref, aua o latou ia o lo o fesiligia e le gata i lea, a o lea e faatonutonufolau ina ia malamalama ma maioio tulaga e pei ona i ai le faagasologa o le oo atu o Matagaluega. E leai lava se mea e misi i le iloiloga, e fesiligia uma tulaga uma e pei ona i ai le Tala o le Tupe lea ua taatia i lumamea. Ou te talitonu lava au o se Tala o le Tupe pito i sili ona manino, e leai lava se lavelave o i ai, ai seiavagana lava o se tama taalo e le o mamalamala i le faataunuuna o nei fuafuaga uma. Aua e i ai lou talitonuga, e i ai foi si malamalamaaga i le tulaga tau faiaoga lakapi. E i ai lava isi tagata taaalo po o players e masani lava ona faatonu faapea i le taimi e faagasolo ai le taaloga. A uma mai le afa muamua, o i ina e iloa ai e le faiaoga po o le a le isi faagasologa o le game plan. O le vaai a le faiaoga, e i ai isi e taaalo, e pei e taaalo i tua i le au maimoa, e le o taalo ina ia malo, ae taalo ina ia viia. A o le talitonuga e pei ona i ai, o ia lava tulaga uma e pei ona i ai le faataatiaga o le Tala o le Tupe, ina ia sologa lelei, aua e leai lava se faiaoga e mananao e taaalo sana au ina ia faiaina. E tasi lava le agaga o le faiaoga e pei foi ona i ai lenei Tala o le Tupe, ina ia sologa lelei ma agai i luma le faagasologa o galuega.

E pei na o se faaata lava lea i lou lava sui usufono e avea ai ma sui o le Komiti, ae i lenei itula, e momoli tele atu le faafetai. Faafetai i le filifilia foi o lou nei sui usufono...